

中國方志叢書·華北地方·第五十號

據清·吳式基等纂修
民國九年重刊本影印

山東省

朝城縣鄉土志
(全)

成文出版社印行



10107737

中華民國五十七年三月壹一版

朝城縣鄉土志

定價：新台幣一二〇元正

發行人：**黃成助**


臺北郵政信箱二二六〇五號

出版者：**成文出版社**

臺北郵政信箱二二六〇五號
電話：九二二〇一〇五號

印刷者：**正大印製廠**

三重市長生街二號之一



內政部登記證內服委業字第一一四七號

鄉土志序

古者輜軒之使問俗採風貢之天府勒爲成書此詩所以宣風化書所以紀政事而風土人情山川景物治道之沿革世風之淳澆莫不畢寓於其中自周轍旣東王綱墜而詩書云亡我孔子怒焉傷之不得已取魯春秋而筆削之褒則榮於華袞貶則嚴於斧鉞誠千古奉爲圭臬者也秦漢以降代各有史忠奸賢不肖傳於奕禩然皆綜其赫濯者垂之青簡至一鄉一邑無赫赫耀人耳目之事則略而弗能概記於是

省有志郡有志縣有志燦然明備似無遺憾矣未也
光緒乙巳袁君樹勛撫山左憫山東通志久未續修
也奏請名進士孫君葆田爲督辦纂修通志一書徵
集各郡志各縣志猶恐貽譏罣漏也諭令各縣編輯
鄉土志以備資料限一月竣事維時宰朝者袁君大
啟延請玉書吳君允升張君主筆而謝君得所賈君
銘恩均職司采訪基亦與參末議特以限期迫促基
等耳目又苦狹隘搜羅所及恐末周徧深望後之君
子有以補苴其罅漏則幸甚矣

癸酉拔貢候選州判吳式基

朝城縣鄉土志

歷史

本境名朝城始於唐開元十年漢置東武陽秦漢以前是何地名不見史傳降至後世名之或沿或革爲郡爲縣與夫統隸何州代各不同謹詳列之

唐虞屬兗州地

夏屬兗州

商屬王畿地

周初爲衛地

春秋齊魯衛界地

戰國爲魏地

秦屬東郡

漢置東武陽屬東郡兗州部新莽易名武昌

曹魏屬陽平郡

晉置陽平郡屬司州部

南宋置陽平郡屬兗州部

北魏置陽平郡後爲武陽郡復屬司州部

後齊郡廢

後周復置屬魏郡

隋屬莘州後屬魏州大業初州廢置武陽郡屬兗州
部

唐貞觀十七年省入臨黃莘縣永昌元年復置武聖
縣開元十年改爲朝城元和中屬澶州後屬魏州
天祐三年改武陽尋復爲朝城屬魏州河北道

五代時爲朝城

宋屬開德府統於河東東路

金屬大明府大名路

元屬濮州統於山東東西道東昌路總管府

明屬東昌府濮州統於山東布政司

國朝因之雍正十三年改屬曹州府

政績

漢

臧洪字子容廣陵射陽人靈帝時爲東郡太守治武陽初爲張超攻曹洪說超舉兵誅董卓與諸牧守會於酸棗設壇爲盟將盟無敢先登者洪乃登壇慷慨

言曰賊臣卓禍加至尊今會義兵共赴國難有淪此盟俾墮其命聞者激揚袁紹表爲東郡太守時曹操圍張超於雍邱洪聞之將赴其難自慮寡弱從紹請兵不聽未幾雍邱陷洪怒絕不與通紹興兵圍之歷年不下使洪邑人陳琳以書示洪洪答書讓之紹知洪無降意增兵急攻城陷被執紹會諸將見洪謂曰今日服未公據地曠目曰惜洪力劣不能推及爲天下報讐何爲服乎答書詳三國志祀名宦陳容臧洪同邑人隨洪爲東郡丞城未陷時洪使歸袁紹及洪

被執時容在座責紹殺洪紹慚怒復殺容事見三國

志祀名宦

隋

張允濟青州北海人爲武陽令教化大行道不拾遺
有人夜發遺袍行十餘里始寤人語之曰可還取之
果得袍又元武民有以犍牛依婦家者孳十餘犢而
不還訟縣不能決乃詣允濟令左右縛民蒙其首過
婦家云捕盜牛者令盡出牛質所從來婦家不知遽
曰此婿家牛遂斷牛還婿

宋

田諒青州人慶厯壬午以著作郎知縣事時值兵興大河以北賦調紛急諒乃盡心撫字邑無流亡

明

郭黼洛陽人監生洪武初知縣徙建縣治尤多惠政百姓安之

徐有德陝西靜甯人監生正德五年爲朝城縣丞體貌魁梧有大畧時河南盜起所至殘破有德大修守具令近城民庶悉移家中清野以待寇數至攻城

不下退無所得及大兵至縱兵擊之殺獲幾盡

楊昱福建人舉人嘉靖十三年知縣事愛民勤政每
遇款獄輒予輕比利弊所在慮壅於聞乃作一甌鎖
閉封識止留一孔置於衙前令士民密書以納月一
開焉視其所陳利弊而興革之

左希顏江西星子人嘉靖二十一年知縣事爲政嚴
明深諳民情初馬政淆亂吏胥因緣爲奸希顏嚴定
規則俾勞逸皆均牧人稱便郡司嘉其能下其法於
各屬又兩稅徵科書吏舞弊輕重不等希顏爲平準

之法弊端悉絕

楊天民山西太平人進士萬曆十八年知縣事下車問民疾苦興利除害出民湯火前案之壅滯者一一斷結置社倉平賦役均出納有古循吏風公餘進諸生講說經義旁及百姓士習因之不變後擢吏科給事中朝民爲立去思碑祀名宦

彭宗孟浙江鹽海人進士萬曆三十年知縣事嘗曰小民樂生關之縣令也因約以裕民去額外之賦罷不急之工時有督濬河之役多方區處夫餉不煩民

間初驛站多侵漁費不貲宗孟痛革之小民控訴不用差役卽令其人自行傳案民免需索清廉之節始終如一民爲建生祠祀名宦

鄭人懌北直沙河人舉人崇禎十四年知縣事渠賊馮培蘭等劫奪鄉里人懌以計擒之人稱快焉後遭土寇城破殉難

趙應昌陝西太平人歲貢崇禎十六年知縣事夙抱膽畧手擒大寇宋玉等及闖賊僞檄招降不屈而去

國朝

我朝崇尚吏治慎選守令康雍嘉道號稱盛世官本境者必多政績卓著之賢員惜縣志失修故老凋喪無從稽考其可得而述者僅在近時焉

邱晉直隸寶坻人副貢順治十七年知縣事聽訟明允欽恤爲心有告隱地畝者得實但令其科餘無所問政簡刑清吏胥斂手在任九載始終如一以憂去民爲立去思碑

劉大紳里籍不詳乾隆間履任以廉惠稱有劉青天之目朝之漕米舊多浮收大紳至時值開徵乃親詣

水次使民自量自概積弊以去聽訟一問輒結鄉民感德值大紳初度父老爭攜瓜果躋堂介祝去官之後人思之曰安得使君如劉青天者乎

胡聯奎山西交城人進士咸豐六年知縣事時盜風日熾四境被搶者層見迭出聯奎到任聯保伍選捕壯懸重賞盜遂斂跡聽訟明決日坐堂收呈奸民不敢輕試每逢水旱偏災下鄉勘驗必躬必親性極嚴正請託不行當時有包閭羅老之目

董涵字子美漢軍旗人副貢咸豐十年知縣事愛民

如子善政林立十一年春莘冠等縣教匪大起三月十六日匪首張玉懷率衆攻城故不完旋即失陷涵督役巷戰力竭自刎賊斷其首懸之西門屍身委棄城外范令夜遣壯士昇身至范以棺盛殮首亦爲鄉民孟某竊去用盆掩埋其年八月涵弟自范起柩路經朝城孟某以埋首告啟盆而視面仍如生觀者驚異遂開棺合殮焉扶柩北上之夕士民哭送十餘里初涵聞賊警幕友王某謂城難守勸涵遁免涵正色而言曰城亡與亡吾之分也何遁爲

權汝欽江蘇銅山人同治二年知縣事邑舊有飛沙數百頃春夏遇風青苗被壓顆粒不獲仍完糧賦有其地者甚以爲病汝欽履畝勘實稟請 奏免朝人至今感戴

姚觀峒直隸青城人舉人光緒二年四月署縣事自春迄後五月猶復亢旱不雨野無青草城東南黥民聚衆向富戶索糧名曰均糧觀峒曰此亂機也漸不可長捕得爲首者立置之法然黥民仍有思亂之心在安住寺糾集夥黨數百觀峒聞之夤夜帶兵往勦

出其不意至皆駭散論者謂非觀峒勇敢則亂成矣
旋以憂去至今人猶追思不置

陳佐平安徽宿遷人舉人光緒五年權朝城事斷獄
如神案無留牘濬河渠興學校邑人至今誦之

黃葆年江蘇泰州人進士光緒十七年署朝城下車
以來愛民訓士孜孜不倦朝地污下每逢秋淹漳河
水溢西北村莊受害甚鉅葆年派夫濬深舊渠道之
俾東北入運自是朝無水患十八年歲歉葆年稟請
賑濟窮黎賴以全活城垣久圯不足資保障葆年籌

得巨款修築一新四圍徧植楊柳今已二十餘年樹皆合抱邑人目爲甘棠之遺

耆舊

漢

謝弼字輔宣靈帝建寧二年以對策除郎中時青蛇見前殿大風拔木弼上封事痛陳災變後去官家居中常侍曹節從子紹爲東郡太守中弼以罪死獄中初平二年司隸校尉趙謙訟弼寃始收斬紹祀鄉賢後魏

路恃慶有幹才相州刺史表薦之太和中除奉朝請
恃慶以從兄文案舉才望因推讓之高祖遂并拜焉
祀鄉賢

隋

田真與弟慶廣同居諸婦欲分異家有紫荆樹一株
甚茂兄弟議破分爲三一夕樹枯真驚謂弟曰木本
同株是人不如樹也兄弟感而更合諸婦聞之亦無
間言明日荆復榮

宋

譚廷美周世宗鎮壇淵募置帳下從征淮南以勞授
控鶴軍副指揮使宋太祖卽位王端寇朗州廷美率
兵赴之敗其衆擒端以還擢鐵騎指揮使領睦州刺

史

明

楚樟警敏過人淹該經史洪武間以明經舉任本縣
訓導儀矩嚴飭士人多所觀法後徵爲詹事府丞著
有四書說約行世

王禮任字訓術幼喪父事母曲盡其孝食必具酒肉

必待母饌然後入口母病禮侍湯藥必先嘗及母卒
哀毀逾禮水漿不入口者數日晝夜悲號不絕廬墓
三年事聞旌表詔復其徭

魏元字景善天順元年進士授禮科給事中時萬貴
妃兄弟驕橫元疏劾之慈懿太后崩議欲別葬元率
同官抗章極諫竟得如禮其年九月慧星見又率諸
給事上言痛陳時弊皆見明史累遷都給事中出爲
福建右參政巡視海道嚴禁越海私販巨商以重金
賂元怒叱之母卒哀毀廬墓三年祀鄉賢

謝綬字朝章成化甲辰進士初令任邱興利除害民大悅三載擢留臺御史守備蔣琮恣肆綬以不法劾之下吏出按山西都督李翊剝削士卒公列其罪羣吏震懾復按兩浙歲饑民多流徙方造進用羅綺費巨萬綬奏罷之武宗卽位逆瑾擅權招通賄賂綬無所贈且與抗禮瑾銜之瑾誅召爲大理寺卿多所平反以都御史巡撫山西簡稽軍實黜逐貪暴威聲遠震以勞瘁卒於官祀鄉賢

江東字伯陽嘉靖乙丑進士爲山西巡撫獲穴金巨

萬入告濟邊擢兵部左侍郎陞工部尙書倭亂江南
廷推東文武才改兵部尙書奉詔討平因陳防海八
事戊午山西右衛被圍世宗選主客兵七萬以東往
援圍遂解捷聞加東太子太保通州告急世宗震驚
聞東勤王至喜曰朕無憂矣詔督六鎮援兵京師解
嚴上偉東勛召見面勞賜匾曰攸奠邦本卒謚恭襄
祀鄉賢

李繼宗嘉靖辛丑進士授刑部主事歷官陝西按察
司僉事區處芻餉調度戰守悉合機宜疆宇賴之兵

民爲立生祠初繼宗未達時有王誼者惠之登第後誼子貧甚繼宗爲置田三百畝報之祀鄉賢

吳中傳號巽菴萬曆甲戌進士任西安府推官斷獄明允升戶部主事管理通州倉一切刁需之弊釐革殆盡督蘇州兵儲羨金千餘悉報部參政楚藩旋轉陝西按察使按部辨明冤枉勸善懲惡調雲南廉憲振綱肅紀問民俗祛吏弊奸豪懍懍有神明之稱巡撫首薦於朝未及大用而卒祀鄉賢

陳贊化字金絃性孝友登天啟壬戌科進士筮仕太

湖多異政調桐城值魏璫籍都憲左光斗家時璫焰
方盛羣僚獻媚贊化獨毅然爲左調護懷宗卽位欽
取入京授刑科給事中秉道疾邪風節益峻周延儒
爲相方膺罷眷招權納賄贊化上疏劾之疏載明史
由是直聲動中外厯官左副都御史以勞瘁嘔血假
歸調養卒於途祀鄉賢

史蘭邑庠生性至孝居父喪廬於墓側惟白糜一餐
以土輿築墳日課五輿朝夕伏墓哀號久之脊毀骨
立猶鹽鼓不入口見者無不感慟年餘疾作而卒

張坦性至孝父炳有痼疾坦侍藥日不離側三十年無怠志當道屢以孝待旌壬午閭閻有回祿之災獨坦室不焚僉謂孝感所致以歲貢任滑縣教諭

吳同芳庠生性傳之子性至孝父獲疾芳捧湯藥滌溺器刷穢席歷數年不倦及病危芳焚香禱祝願以身代父病遂愈咸以爲至誠所感大府表其里爲孝子里歲給穀三石

岳爾高邑廩生慷慨有氣節崇禎十六年賊攻城城陷與長男中瑾俱殉難妻孟氏聞變嘆曰夫亡矣將

安歸遂偕冢婦呂氏及三女皆投井死

徐宗正父早逝事母至孝以歲貢授商邱縣主簿修河有功陞西平府丞以母老請假歸養適境內遭蝗食稼殆盡獨宗正禾無損人以爲孝感所致祀鄉賢邵璋嘉靖庚子舉人周歲喪母及髫謁墓痛哭倒地事繼母如所生父八十病痢甚璋卧床下一夕數十起手捧溺器洗滌穢污盛暑弗輟嘗矢苦喜曰父無恙也尋愈後五年卒提學匾其門曰純孝里

江世茂恭襄之孫時值歲饑散所積粟數千石以濟

餓者人皆感之世茂自謂義分當然無德色

王以遜邑庠生父增生九德病痿母羅氏病瘡以遜偕妻馬氏親湯藥洗拭膿血晝夜無倦色及親卒哀毀柴立分居讓產於弟有薛包之風按臺以入孝出弟匾其門

國朝

孟兆熊順治辛卯舉人性孝友生平多大節士林則之深於麟經著有春秋題說

吳汝昌字致亭嘉慶丁卯舉人性恢豁好施予歷署

陝西韓城南鄭等縣補郿縣知縣擢升甯羗州所至有惠政所得廉俸悉以濟人邑之鰥寡孤獨無所歸者莫不優恤之故人皆呼曰吳青天卒於任所廿餘年後子瑛山以事過甯邸旻知爲汝昌子概不取值馬克印居家孝友數世同居家素封好施予以至家中落聞於太守匾其門曰孝友任恤

賈泰臨字德昌邑增生性孝友有志節家貧樂道研究經史探取經義著四書句解

梁萬書城北妹塚人幼孤貧種菜爲生力勤守約中

年致富仗義疎財凡貧苦親隣有求必應每至年終度其左右村人有不能度歲者不待來求酌量往遺至老不變遠近有梁善人之目

夏有辰夏莊人性孝謹父早故事母四十餘年毋敢少違同治元年羣寇犯境有辰負母逃避母猝遭疾醫葯罔效呼天乞以身代母疾尋愈

李耀彩全莊人家赤貧事母極孝母遇疾甘旨無從得剪髮易食物委曲承歡遠近稱爲孝子

孔廣松武生居城西孔家莊性慷慨好施予排難解

紛爲鄉所推道光二十七年盜賊入境悉力拒守縣境以安聞隣村被劫親率團丁急追奪回車輛牛馬俱還失主嘗與賊戰身中鉛丸者四氣愈奮邑令壯之上其事於府太守李天錫贈以匾額鄉里榮之王步衢邑庠生同治五年教匪張躋堂率賊數千人攻舍利寺步衢率隊守圩圩陷祖母與父被圍急往救護曰請速殺我無傷二老人遂皆遇害

閻克順武生舍利寺圩破克順率衆接戰被戕奮不顧身闖入賊隊手及十餘人力竭被執比死罵不絕

口

馬岐山邑庠生居城北仁四里之張魯集成豐十一年三月十七日教匪陷城岐山聯合鄉衆築圩禦賊後賊攻圩竭力固守圩得保全莘縣延營從正爲各賊首領築堡自衛十月間大帥勝保督兵來勦岐山請爲前鋒傾其巢穴殺獲無算臬司丁寶楨知岐山勇敢檄召隨營勦賊屢立戰功保府經歷分發江蘇郭紹泰字靜齋城西郭爐人光緒乙酉科藍翎侍衛初官粵西梧州營中軍都司繼調署興甯營忠義奮

發每誦伏波馬革裹尸之言以自勵兩勦會匪皆一
鼓盪平以功升遊擊署粵東清遠營遊擊公出暴卒
鄉人聞之皆爲扼腕紹泰少孤事母曲進色養以賴
胞叔癸元成立事之如父友愛羣從尤逾尋常又以
胞叔癸元食指繁多勸家人勿析產親鄰貧者亦蒙
恩施

附節烈婦女

明

郭氏熊璋妻年二十餘夫亡遺孤僅二歲氏堅意撫

其 卷之二
恤貞白自矢卒後有芝生於柩上素光掩映異香滿
室邑令親詣審視請於臺省優恤建坊迄今子孫繁
衍爲邑望

廩生岳鎮女適孟澤洙甫四月澤洙亡氏撫屍哀號
誓不欲生家人日夜守護氏痛哭不已數月後卒以
身殉遠近聞之皆嘆息泣下

國朝

孫氏鄭三根妻家赤貧祖姑老而瞽恃姑縫紉爲養
氏至代其勞勤苦備至逾歲夫亡氏年二十矢志靡

他父某以氏年少無恒產論令改適不聽逼之遂自
詣夫墓痛哭歸卽自經

烈女城北張乙屯監生張鶴林之女十六歲未字人
同治七年捻匪由陝竄東張乙屯適當其衝圩破獲
女艷之虜繫馬上求死不得適路側有井羣賊汲水
飲馬女給言口渴賊信之聽女下飲遂投井而死

邵氏張寨劉桂芳之妻夫早逝遺一子一女時土匪
騷擾沿村婦女多被搶掠氏恐見污送其子於他所
與女並縊

孫氏沙村孫誠倫之女年十七字於餘糧海劉君平之子劉克成將于歸而克成亡女聞奔喪母不能禁偕往女詣柩哀號不已母勸歸女曰此卽家也將焉歸遂留事翁姑恪執婦道守節終身

兵事

前代遠不能詳自入

國朝以迄中葉本境均無兵事至咸同間始有之謹紀於後咸豐四年金陵洪逆以先遣北犯李開芳諸賊爲僧忠親王困於阜城二月遣黃生才會立昌等

率賊數萬北援阜賊三月初二日陷陽穀趨莘縣又自莘趨冠縣遂犯本境張魯集一帶多所殺戮兼虜人民至臨清經都統勝保擊敗折回南奔復犯本境之王奉大場大受其害

黃生才陷陽穀之夕土匪李兆先糾黨數百人冒粵賊陷城殺知縣任騰蛟放獄囚焚公廨城中劫掠一空當卽解散越數日濟甯州知州黃良楷帶兵來朝彈壓緝獲兆先凌遲處死

咸豐十一年二月間莘冠等縣教匪蠡起作亂時匪

旗幟分五色黃旗張玉懷白旗程順書黑旗宋景詩
綠旗楊朋嶺紅旗延掄秀莘冠等隣縣皆失三月十
七日黃旗張玉懷率衆攻城城久圯不能守殺知縣
董涵城民被殺者百餘自城陷後數月無兵至各旗
匪此往彼來來則民間供億稍不如意卽行殺戮至
六月大兵進勦或竄或降本境始無匪踪
八月官兵攻竹口踞賊教匪數千來援官兵遏之追
殺至近城之岳莊而回賊尸相望

十一月間擒匪劉占考盤踞范縣劫掠鄉村名曰打

糧本境大受蹂躪十四日將軍國瑞統帶吉江馬隊
並翁蔡李三營步兵分駐城內外十六日分軍進攻
炮摧其城樓凡攻二日賊窮蹙投降地方肅清國帥
拔營南下

十一年八月秋各旗匪就撫復叛號曰降衆同治元
年正月降衆楊朋嶺張錫珠張玉懷等大肆焚掠都
統伊綿阿由本境大場追勦忽退壁小灘由是玉懷
錫珠朋嶺合股犯本境之大王寨王奉集所過焚屠
如洗團長孔昭著率團禦之昭著陣亡團衆死傷千

人以上二月初二日降衆程順書等復犯本境之樂家屯畢家屯張魯集匝地烽烟初六日攻圍城東南之舍利寺圩破屠男女數千人初邑人張躋堂與舍利寺團長邵翼之有讐至是引匪誓破之燔掠特酷又分股犯濮壽之境大股攻城知縣王培楨百計固守城不得陷

二年八月降衆黑旗宋景詩自陝西叛歸屯聚堂邑甘管屯僧親王破之竄入本境之柿子園漫延西北楊莊韓莊岳莊僧軍追勦遂南奔觀境

六年九月捻匪張總愚自陝西由豫境趨入本境之畢家屯一帶沿途殺人到處焚掠破山家堂圩殺廩生吳芹英王獻典等百餘人幸大兵尾追一宿卽奔莘境

人類

本境漢戶外祇有回民無番畬苗等種

回

回人相傳自唐貞觀年入中國本境之回人多聚居城內北街關廂與城西北四十五里之張魯集他村

亦有之皆零星小戶其係真阿刺伯人與否年深代遠彼族亦不能詳風俗不食犬豕不與漢戶通婚崇尚謨罕默德教名曰清真教有經三十卷名曰古爾阿尼經有寺名曰禮拜寺主教者曰阿訇每七日共詣寺禮拜曰主嘛不祭祀追遠則請阿訇同跪墓前曰走墳不論小建閏月以三百六十日爲一年曰大節其戶口數開列於左

本城

北街一百一十二戶

人數二百三十餘口

西街五十七戶

人八十餘口

北門外十四戶

人二十餘口

西門外二戶

人二口

宋海二戶

人八九口

陳莊二戶

人四五口

陳堂二戶

人十餘口

馬廠五戶

人八九口

謝集十戶

人二十餘口

桃園八戶

人二十餘口

八里舖 五戶

人二十餘口

栗海二十五戶

人三十餘口

謝爐 五戶

人十餘口

石莊 三戶

人三四口

張魯六百六十五戶

人九百餘口

朝城縣十七里共五百五十二莊村共二萬六千餘

戶大小男女共一十五萬一千餘口

氏族

本境大姓曰孫曰謝曰吳曰江曰岳曰孟曰魏曰賈

八姓在前明皆簪纓世繼入

國朝子姓繁衍散居城鄉甲於他族

孫姓土著受氏未詳

謝姓明洪武初自山西長子遷至今二十代以國受
氏吳姓洪武初自山西洪同遷至今二十代以吳國
受氏江姓原籍浙江遂安明天順間江原旻任朝城
教諭因家焉至今十六代受氏未詳

岳姓洪武初遷自山西平陽至今十七代以唐四岳
受氏孟姓亞聖裔明自鄒縣遷至今十八代因魯孟

孫受氏賈姓洪武四年遷至今二十一代因春秋賈國受氏

魏姓遷自江西南昌至今十九代受氏未詳

宗教

本境祇有回教天主教無耶蘇教與喇嘛教黃教紅教入回教者亦無旗漢人

回教

詳人類

天主教

本城德國教堂一處房屋十間

秋五里程路口德國教堂一處房屋十間
沙四里田海德國教堂一處房屋五間
在二里陳莊德國教堂一處房屋二間
共有教民六十餘戶

實業

士 讀書士子約有千餘名

農 除士工商外人盡業農

工 本境無美術家尋常攻金攻木泥瓦磚埴之工
共有兩千餘人

商 城鄉銀錢雜貨茶酒鐵貨各舖約有一千二百
餘名

地理

本境在省城之西南至省三百六十里在府城之北
至府一百八十里東界陽穀壽張東南界范縣西南
界觀城西分界直隸南樂元城西北界冠縣正北東
北界莘縣

本境分爲十七里

秋五里在城北距城十八里北界莘縣南境東界陽

穀西北境西界東三秋四南界城北門在一

在一里在城東北距城十里北界秋五東界陽穀西境西界城東門南界在二

在二里在城東南距城二十里北界在一東界沙一南界沙三沙四西界縣城沙四

沙一里在城東南距城三十里東北界陽穀西南境東南界壽張西北境南界范縣北境西界在二沙三東南有黃河金隄

沙三里在城東南距城二十五里北界在二東界沙

一南界范縣北境西界沙四

沙四里在城南距城二十五里北界在二東界沙三
南界觀城東境西北界沙五

沙五里在城西南距城二十里東南界沙四東北界
秋五南界觀城東境西界沙六北界秋四

沙六里在城西南距城三十五里東界沙五南界觀
城北境西界南樂東境北界秋三

秋三里在城西距城二十五里東界縣城南界沙五
西南界沙六西界南樂東境北界秋四

秋四里在城西北距城二十里東北界東二西北界
東三西南界秋一東南界秋三

秋一里在城西北距城二十五里東北界秋四東南
界秋四西南界南樂東北境西北界元城東境

東二里在城西北距城二十里北界莘縣西南境東
南界秋五西南界秋四西北界東三

東三里在城西北距城三十五里東北界莘縣西南
境東南界東二南界秋四西南界秋一西界元城東
境西北界仁四

仁四里在城西北距城四十五里東界莘縣西北境
南界東三西界元城東北境北界仁三

仁三里在城西北距城七十里東界莘縣西北境北
界冠縣

仁二里在城西北距城八十里東界仁三南界元城
東北境西界元城東北境北界仁一

仁一里在城西北距城九十里東界冠縣西南境
南界仁二西界元城東北境

城內分四區東南區有舊縣治

咸豐四年燬於土寇

文廟關帝

廟城隍廟馬神廟文昌閣武魁樓呂祖閣僧忠親王

廟南門裏有進坊二

一爲王察言立
一爲魏元立

南門外有步雲

橋在城濠上

齊桓公朝諸侯處碑二賢祠

祀漢東郡太守臧洪與郡丞陳

容

火神廟泰山廟西南區有寧國寺峻塔石燕井寶塔

朝烟石燕飛雨
爲邑八景之二

八蜡廟西門裏有真武廟西門外有

秋波橋

在濠上

節孝坊

爲鞏學詩之妻氏立

流通橋

近城西南地最下每

盛夏大雨水由
此北流入溝渠

西北區有龍廟北門裏有禮拜寺回

所建誥勅重光坊

爲岳電立

北門外有拱辰橋

在城濠上

北極廟

三皇廟東北區有丹霄觀

丹霄夜月爲邑八景之一

山西會館

地極

宏廠高等小學堂初等小學堂半日小學堂東門裏有

碧霞元君廟節孝坊

爲吳方西之妻

氏立東門外有春澤橋

在城濠上東嶽廟農神廟

壇

社稷壇

在西門外迤北

風雲雷雨山川壇

在南門外迤西

邑厲壇

在北門外迤東

秋五里樂家屯有市集八里鋪有橋許昌塋有泰山

廟

在一里陳莊有市集

在二里南臺有瀑水橋

橋側有釣魚灘按續志穆天子東征釣於瀑卽此江

樓有橋

沙一里李臺有市集

陽壽朝三縣交界

東臺頭

傍金堤

沙三里舍利寺有集市有佛寺

寺前有塔高十餘丈

虞舖

武水發源

處岸西唐莊宗駐軍於此

沙四里王省莊有橋

引河起處

會橋有橋柿子園有集市

張大王廟有古刹八里舖有集市

沙五里姚廟有大梵寺奶奶廟有大廟

規模宏廠

呂村有

大廟後呂村有齊王廟秦廟有東嶽廟王山有小土

阜孟莊有會朝臺

至今土壇猶在按廣輿記春秋齊桓公率諸侯朝周會於此

有

漢臧太守墓

在孟莊迤北臧陵麥浪爲邑八景之一

沙六里韓莊店舊縣

按舊志明洪武五年城圯於水因徙移焉

馬集有集

市

界南樂

秋三里秋源寺有文廟王樓有文昌閣左莊有華陀

廟五里墩有菩薩堂

秋四里孔莊有泰山廟草屋寺有廟

秋一里劉羨有集市

東二里歇馬廟有泰山廟妹塚集有集寺

古武陽郡

新店

集有集市有橋

東三里畢屯有集市有橋小韓張有集寺

仁四里張魯集有集市有文昌閣有蒙養小學堂

仁三里大王寨有集市有蒙養小學堂前觀上有老

君廟苗頭有田氏祠

祀隋田真及弟慶廣有石碣曰紫荆故里

仁二里王逢集有集市

水

本境平衍之地向無山阜舊有三水俱皆涸塞茲將

澗塞之水列後

馬頰河自大名開州過本境經高唐清平至樂陵入

海灤水舊志源在本境城西南按水經注源在頓卽

出東武陽東武陽卽本境由陽穀博平經清平西山灤川達

於高唐界東北流至千乘入海

武水在城北發源於本境虞家舖東南一里灤河而

西至董村口復匯而東經韓張店南至聊城界東北

流至青武陽溝又過東武入海

本境人力所通之溝有二名曰引河一自城南劉墩

起經于舖遞至王槐莊過陽穀界一自城西南王店起經許海畢家屯同入莘境滙爲一平時無水每逢盛夏大雨水漲貫入溝中由莘奔流注運河

道路

由山東省至河南省大道自莘縣城南中心閣接入本境王家舖十里至八里舖又十里至城由城出西南十里卸家樓又十里韓張店七里王莊集入觀城界

由本境至曹州府路出城南十里十里坑又十里柿

子園又十里郭灘集入觀城界

由本境至范縣路出城東南十里三義廟又十里馬老莊又四里岔樓入范縣境

由本境至壽張路出城東南十里張樓又十里狼集入壽張界

由本境至陽穀路出城東十里東孫莊又十里喻家樓入陽穀界

由本境至東昌府路出城北十里八里舖又十里王舖又五里中心閣入莘縣界

由本境至臨清路出城北十里胡集又十里賈廟又
十二里田集入莘縣界

由本境至冠縣路出城西北十里妹塚又十里山堂
又十里程大營又十里張魯集又十里大王寨又十
里觀上又十里大場集至冠縣界

由本境至大名府路出城西北十里董莊又十里長
史又十里任屯至元城界

由本境至南樂縣路出城西十里張寨集又十里雙
廟又五里大青集入南樂界

物產製造

本境不濱山河地不出礦物既無特產之物類亦無特別之製造其物產製造皆屬常品畧列於左

動物產

有牛馬騾驢羊猪犬貓獾狐貉狸鼬俗名鼠兔鼠有

雞鵝鴨鵲鳩鴉鸛鷓鴣雁雀鴿鶉啄木鷓鴣燕鷗

百舌戴勝噉嘴黃雀有蚕蜂蛾蜘蛛蝴蝶青蜓蝙蝠

蠅蚊蟻蛇蝎蝟蛙蝸牛蟋蟀螻蛄螂蝎虎螻蛄蚰蜒土

鼈蟬

植物產

有黍稷麩麥來麥蕎麥穀梁芝蔴菜子秫葛綠豆黃
豆黑豆青豆紅豆白豆扁豆有李柰桃杏梨棗石榴
櫻桃林禽花果有青楊白楊柏榆柳桑槐柘唐棣

亦名

杜棣椿香椿花椒荆檉杞柳

有芥藕山藥金針葱蒜韭茄芫荽君蓮菘蔓菁瓠子
萵苣茼蒿苦菜生菜菠菜葵辣蘿菔紅蘿菔葫蘆藤
藟于瓜西瓜東瓜南瓜絲瓜苦瓜甜瓜菜瓜地瓜長
生菓有菊荷蜀葵玉簪夜合月季雞冠金盞紫荊丁

香扁竹迎春木槿有葦蘆蒲茅莎稗莠艾蒿苜蓿蒼

俗名野有地丁穆子薄荷紫蘇蒺藜茵陳葶藶公英

澤蘭車前葦蕪香附枸杞瓜萋夏枯草益母草錦

草

動物製造

羊毛為氈為帽牛油為燭牛皮為鞣鞅鞞鞞等物碎

皮不成用者熬為膠蜂為蜜為蠟繭為絲為綾為帶

植物製造

黍麥為飴為酒高粱為醋芝蔴長生果黑黃豆為油

爲餅綠豆爲粉麩爲粉皮條葦爲蓆檉條爲倉爲舂
杞柳爲筐屬物產自外運而爲本境製造者棉花爲
布細麻爲繩索烟葉爲烟絲

礦物製造

本境不出礦銅鐵錫皆自外境運入銅錫爲飲食器
爲鑲嵌器鐵爲農器兵器釜鍋器

商務

本境地非衝道地瘠民貧旣無特產之製造而外境
之特產製造亦以難售而不來故本境消行於外境

直隸縣志卷之三十一
者以五穀草薶爲大宗外境消行於本境者以棉花
爲大宗

本境消行本境之物

五穀每歲消行二十餘萬石

酒每歲消行一萬餘觔

長生果每歲消行三四十萬觔

白布每歲消行一萬餘丈

蜜蠟每歲消行三四百觔

外境消行本境之物

米麥除本境消行外多運至臨清消行北客亦來本境販運每歲消行二千餘石

草辦皆萊州屬大商設棧本境收買運至省城裝載火車運至青島每歲消行二千餘包

羊皮牛皮多臨清客來境販運山羊皮則本境人自行販運至安徽亳州消行每歲消行一千餘張

長生果除本境消行外運至元城之小灘鎮塚北集消行每歲消行十餘萬觔

絲多本境人販運至聊城之沙鎮長山之周村消行

每歲消行十餘捆

棗梨本境人販運至鎮江等處消行每歲消行六七
百包

本境消行外境之物

棉花多自臨清運入本境又自河南南臨漳運入城鄉
集市每歲消行二萬餘觔

鐵及鐵器一自岔道一自清華運入本境每歲消行
七八餘萬觔

一線麻自河南南固始等處運入本境每歲消行四五

千觔

一食鹽係官運每歲消行二千餘引

This image shows a large rectangular frame, possibly a page from a book or a document. The frame is divided into 10 vertical columns and several rows. The grid is mostly empty, with some faint marks and a small dark square in the top right corner. The page number '8.211.67' is visible at the top center.